

## 《雜阿含 874 經》

大正 874/印順 12931-2/佛光 588 (修證 TB 如是語 74 經)

如是我聞：一時，佛住舍衛國祇樹給孤獨園。

爾時，世尊告諸比丘：「有三種子，何等為三？有隨生子、有勝生子、有下生子。

何等為隨生子？謂：子父母不殺、不盜、不婬、不妄語、不飲酒，子亦隨學不殺、不盜、不婬、不妄語、不飲酒，是名隨生子。

何等為勝生子？若子父母不受不殺、不盜、不婬、不妄語、不飲酒戒，子則能受不殺、不盜、不婬、不妄語、不飲酒戒，是名勝生子。

云何下生子？若子父母受不殺、不盜、不婬、不妄語、不飲酒戒，子不能受不殺、不盜、不婬、不妄語、不飲酒戒，是名下生子。」

爾時，世尊即說偈言：「

生隨及生上，智父之所欲，生下非所須，以不紹繼故。

**為人法之子，當作優婆塞，於佛法僧寶，勤修清淨心，  
雲除月光顯，光榮眷屬眾。」**

佛說此經已，諸比丘聞佛所說，歡喜奉行。

如五戒，如是信、戒、施、聞，慧經亦如是說。